



MEMORIJALNI
CENTAR
SARAJEVO

SAOPĆENJE ZA JAVNOST

Naučni simpozij

URBICID I SUDBINA GRADOVA: SARAJEVO KAO GLOBALNA REFERENCA:

U znak sjećanja na profesora Michaela Safiera

17. maj 2025, početak 10.00h

Multimedijalna sala Memorijalnog centra Sarajevo (Širokac 1, Kovači) i

Online Zoom platforma

Međunarodni forum Bosna i Memorijalni centar Sarajevo, u saradnji s Gradom Sarajevom, organizirat će naučni simpozij *Urbicid i sudbina gradova: Sarajevo kao globalna referenca*. Skup će biti održan u Multimedijalnoj sali Memorijalnog centra Sarajevo, s početkom u 10.00 sati.

U razgovoru će sudjelovati stručnjaci i znanstvenici s univerziteta, institucija i organizacija u Bosni i Hercegovini, Parizu, Londonu, Torinu, Stirlingu, Alepu, Oxfordu, Groningenu, Berlinu i Hagu koji istražuju urbicid kao kompleksnu pojavu u okvirima urbanih, antropoloških, političkih, ekonomskih i socioloških studija, s posebnim fokusom na uništavanje javnih prostora i institucija, biblioteka i pluralnog identiteta gradova. Pozvani govornici su: Tom Selwyn, profesor emeritus na SOAS univerzitetu u Londonu, Nataša Pelja-Tabori, pomoćnica direktora za planiranje razvoja Kantona Sarajevo, Nada Al Hassan, stručnjakinja za graditeljsko naslijeđe, Pariz; Camillo Boano, profesor na Bartlett školi arhitekture, London; Safet Hadžimuhamedović, istraživač u Centru za znanosti o mjestu i pamćenju na Stirling univerzitetu; Lejla Kreševljaković, docentica na Arhitektonskom fakultetu Univerziteta u Sarajevu. Razgovor će voditi Amra Hadžimuhamedović, direktorica Centra za kulturno naslijeđe u Međunarodnom forumu Bosna.

Simpozij će biti organiziran u sjećanje na profesora Michaela Safiera, urbanistu, teoretičara i prijatelja Sarajeva. Michael Safier dao je važan doprinos teoriji i razvoju edukacionog programa o urbicidu i poslijeratnom oporavku gradova. Njegova veza sa Sarajevom, naročito tokom razdoblja opsade i neposredno nakon nje, bila je presudna u oblikovanju njegovih vizionarskih pristupa istraživanju gradova i urbanističkom planiranju. Koristio ih je u misiji širenja globalnog poziva na akademsku i moralnu odgovornost u suočavanju s pojavom ubijanja gradova. Njegova teorija kozmopolitskog grada kao načina građenja harmoničnog društva nastala je kroz istraživanja Sarajeva i Jeruzalema.

Michael Safier je umro u novembru 2024. godine. Svojim radom dao je neosporni doprinos pozicioniranju Sarajeva u svjetskoj nauci o gradovima. Ličnu biblioteku, koja se sastoji od preko 3.500 publikacija, ostavio je u naslijeđe Nacionalnoj i univerzitetskoj biblioteci Bosne i Hercegovine. Na završetku znanstvenog skupa bit će upriličena simbolična predaja te biblioteke predstavniku Nacionalne i univerzitetske biblioteke Bosne i Hercegovine, ustanove čije je razaranje 1992. godine postalo globalno prepoznatljivo mjesto urbicida, a njeno poslijeratno stanje svjedoči o prisutnim tokovima uništenja temeljnih institucija bosanskohercegovačke države. Legat Michaela Safiera njegov je posthumni doprinos i poziv na obavezu jačanja znanja, solidarnosti i čuvanja kulturnog pamćenja.

Skup je otvoren za medije i širu javnost.

MFB Press